

全華叢書

全華叢書

宋學士全集補遺卷四

明宋濂撰

郡後學胡鳳丹月樵校梓

贛州聖濟廟靈跡碑

聖濟廟者初興于贛漸流布于四方所在郡縣多有之神蓋姓石氏名固贛人也生于秦代既歿能發祥爲神漢高六年遣潁陰灌懿侯嬰略定江南至贛贛時屬豫章郡與南粵接壤尉陀寇邊嬰將兵擊之神降于絕頂峯告以克捷之期已而有功館神于崇福里人稱爲石固王廟唐大中元年里民周諒被酒爲

魅所惑墜于崖下符爽行賈長汀舟幾覆咸有所禳
諒卽返其廬爽見神來護之於是卜貢江東之雷岡
相率造新廟堦石爲像奉焉相傳廟初建時天地爲
之晦冥錄事吳君暨司戶蕭君令康黃二衙官先後
往視皆立化二君亦繼亡逮今祀爲配神云自時厥
後神屢顯嘉應州之東北有二洲曰藍澱曰乾渡每
當長夏水易涸隱起若岡阜舟楫不通宋嘉祐八年
趙抃報政而歸適邁焉亟徵靈於廟水清漲者八尺
清漲俗謂無雨而水自盈也元祐元年夏五月不雨

徧崇山川弗應郡守孔平仲迎神至鬱孤臺燭未見
跋甘霖如瀉四年東城災風烈火熾將延於庫庾林
顏正佩郡章急呼神曰盍憫我蒸民俄反風滅火六
年復災耄倪遙望雷岡而拜月明如晝忽陰雲四合
大雨驟至虐燄頓息建炎三年隆祐太后孟氏駐蹕
于贛金人深入至造水髣髴覩神擁陰兵甚眾乃旋
紹興十九年鄱陽許中爲郡欲新神之宮召大姓二
十人立庭下諭之眾推張銳郭文振心計開敏宜爲
糾率二人謝不能許乃分一番紙如其人之數書二

爲正副字雜封之令自得墨者職如書各取其一開之則得書者二人也眾以神與心通不日而宮成二十七年禁兵合山寇據城逆命子女玉帛驅輦殆盡高宗命都統制李耕殲之陰霾挾逆風爲患士卒弗能前耕私祈焉頃之風順天朗一鼓而城平自是王師南征無不祠以牲牢乞陰兵爲助者淳熙十六年歲當大比州人士劉文榮以夢徵于神夢三十人執高竹而立因更名筌遂入鄉選嘉定十年夏大霖雨江水暴溢城不浸者三版民懼爲魚泣禱甚哀水尋

退亡害紹定三年黥卒朱先率其徒陳達周進蔡發
以叛有旨除荆襄監軍陳塏提刑江西仍護諸將致
討夜駐廬陵夢神告曰先將竄番禺爾宜速圖塏密
命胡巖起李强疾趨至賴合三寨兵戮之淳祐七年
湖南夷獠曾甲嘯眾倡亂聲搖江右部使者鄭逢辰
檄王舜進攻如有神立青霄上兇徒沮駭卒就殄滅
九年安遠崔文廣爲變倚石壁作窟穴潼川姚希得
來持憲節駐兵守之久且弗拔寇見雲中若旗幟飛
翻其膽遂落渠魁乃擒景定三年郡有黎氏獄胥吏

受賕撈掠良民使之承左司吳革疑焉神告以生兆
卒白其寃元至元十七年閏卒張彥真入廟舌吐數
寸足懸半空白述其陰私頗悉類有人鞫讞之蓋神
之顯靈其事不翅數百而於雨暘疫癘之禱驗者尤
夥備見於唐宋碑碣及嘉濟寶錄濂唯各舉其著者
書之所不書者可以例知也宋寶慶間莆田傅燧爲
贛縣東尉豔神之爲撰爲繇辭百章俾人占之其響
答吉凶往往如神面語之者此亦陰翊治化之一端
也吳楊溥時以神能禦菑捍患有合祭法署爲昭靈

王宋五封至崇惠顯慶昭烈忠佑王賜廟額曰嘉濟
元三易封爲護國普仁崇惠靈應聖烈忠佑王復更
之以今額其褒揚光寵可謂備矣至若高宗所賜赭
黃袍纏絲馬腦帶及南唐李煜五龍硯至今猶藏廟
中云濂稽諸經國有凶荒則索鬼神而祭之士有疾
病則行禱於五祀先王必以神爲可依故建是祠祝
之制也世之號爲儒者多指鬼神於茫昧稍與語及
之弗以爲誣則斥以爲惑不幾於悖經矣乎有若神
者功在國家德被生民自漢及今孰不依之雖近代

名臣若劉安世若蘇軾兄弟若洪邁若辛棄疾若文
天祥亦勤勤致敬而弗少怠是數君子者將非儒也
邪何其與世人異也濂初被召而起神示以文物之
祥後果入翰林爲學士心久奇之今故特徇祝史章
法凱之請爲撰靈跡碑一通使刻焉或謂高帝未嘗
伐粵第遣陸賈賁璽綬立佗爲南粵王濂按傳記所
載嬰之畧定豫章在六年庚子佗之稱臣在十一年
乙巳其未臣之前惡知不來侵境而嬰擊退之邪恐
史家以其事微故畧之爾敢并及之系之以詩曰

神雷之岡翠嶮嗟五螭天矯含精微崇祠四阿儼翬
飛像變翕施五采施陰爽襲人動曾颺發祥傳自炎
劉初粵氛侵徼告捷期豈或天星隕魄爲降靈于人
贊化機以石爲氏理則宜大中卜遷墨食龜有聲渢
渢達四垂風霆號令疑所司斥逐厲鬼暘雨時禾稔
穰穰歲不饑民萌鼓腹酣以嬉建炎火德值中衰宮
車駐蹕潁水糜完顏黥卒大步追神兵暗樹雲中旗
卷甲疾走如鼠狸莫猺嘯呼引獠夷禁軍荷祓據城
陴屠劉壯健到嬰兒威神有赫助王師一殲兇豎無

予遺貢江水落洲如坻巨舟皆膠牢弗移鞠躬再拜
叩靈墀赤日火烈雲不衣洪濤清漲沒石磯陰翊王
度功何疑紫泥鸞詔自天題爵爲眞王手執圭風馬
雲輿時往來赭袍籠黃帶纏絲五龍寶硯角鬣奇襲
藏山中夜吐輝陽陰幹運無端倪焄蒿悽愴如見之
休咎有徵神所持委以惚恍邈難知奚不來索庭中
碑

毗盧寶藏閣碑

鳥傷之墟有山鬱盤名伏龍山山顛有寺號爲龍壽

宋治平中又更聖壽寺廢已久莽爲荆榛元泰定末
有大道師千巖長公飛錫而來從者如雲一彈指頃
幻成樓閣導師示寂後十載載比丘如海來補其處
四象悅服如公在時十貳時中嘗作思惟金口所宣
十二分教受時之者發明白性此烏可闕乃與勤舊
良杞是圖西往姑蘇扣諸檀度所施白金數將十鎰
奉以爲贄於福嚴院請致毗盧大藏尊經滿六百軌
捆載而歸鄉之善士至四三千奔走往迎爰自山麓
以達殿堂約三里所夾道耦立各各合掌次第受經

而傳遞之縱橫錯綜無弗及者琅函既登頭面接足
禮佛而退海之與杞又復思惟有經無閣與無經同
何以自表啟人敬心孜孜持厯徧走民間欲聚銖黍
以成邱陵杞弟德隣素樂真因盡心化導惟日不足
又有僧修宣勞其間厯七年久始見功緒乃撤舊堂
載築載營均齊合度無有傾陟於是命工伐木於林
琢石于山造陶於原鍛鐵于冶總總林林不戒而趨
而其梓人曰陳新氏亦絕葷肉率蒞役國朝洪武龍
集丁巳陽月斯屆其日乙卯始奠梁楹閱六十旬乃

訖厥功閣倣五間高七尋周以明軒觚稜騫飛蛩尾
衝霄猶如化宮影落天半中像大悲具千手眼左右
千佛飾以黃金種種莊嚴華侈勝特東西相嚮列以
長龕攢布皮格妥至諸都索怛覽藏毗奈邪藏阿毗
曇藏其爲功德微妙難思邦定因果窮究性相垂範
四儀嚴制三業研真顯正覈爲摧邪無所不具無所
不感有信禮者如聞世雄出大音聲天風海潮震盪
空際一厯耳根萬劫不磨重閣之下仍設高座演說
妙法以聳人天龍鬼之聽遐邇之人來游來瞻舉手

加額歎未曾有海復來謁請述記文用告來者是續
是葺永久不壞我聞法藏總爲五千四十八卷以別
計之凡六百億三萬一千八百八十八字之多於一
字中各有點畫於點畫中各備形聲是名爲字積字
至於三百四百或千萬言是名爲經積經以至恒河
沙數無有窮極悉會于一是名爲心譬之於佛自一
至十自十至百自百至千千佛千身於一身中各具
手眼是名爲佛一有不具於相則乖大慈悲父以一
佛身用表千身示現神變出千千眼俱到捧執摩不

如意是名大慈大悲之道是名法藏或微或顯不越
一心心外無法法外無物千佛各具不見其少大悲
通具不見其多此何以故清淨海中微塵刹土佛身
充滿無有限域天地日月河山草木飛走游泳洪纖
高下有情無情或出或沒在佛身中舉無外者雖其
手眼至那由他及無算數亦不見余況止一千由此
而觀手眼同徧於虛空界不見一隻亦猶契經充塞
宇宙不覩一字無體之體無文之文終日呈露徧照
十方斂藏于密初無一髮苟以凡情妄加度量如刀